

四庫全書

集部

欽定四庫全書

御定全唐詩錄卷三十

杜甫

七

近體詩二

題玄武禪師屋壁

何年顧虎頭滿壁畫瀛洲  
赤日石林氣青天江海流  
錫飛常近鶴杯度不驚鷗  
似得廬山路真隨惠遠遊

客夜

欽定四庫全書

御定全唐詩錄  
卷三十

客睡何曾著秋天不肯明卷簾殘月影高枕遠江聲計  
拙無衣食途窮仗友生老妻書數紙應愁未歸情

客亭

秋窻猶曙色落木更天風日出寒山外江流宿霧中聖  
朝無棄物老病已成翁多少殘生事飄零似轉蓬

涪江泛舟送韋班歸京

追餞同舟日傷春一水間飄零為客久衰老羨君還花  
遠重重樹雲輕處處山天涯故人少更益鬢毛斑

春日梓州登樓

行路難如此登樓望欲迷  
身無却少壯跡有但羈棲  
江水流城郭春風入鼓鞞  
雙雙新燕子依舊已銜泥

鄴城西原送李判官兄武判官弟赴成都詩

憑高送所親久坐惜芳辰  
遠水非無浪他山自有春  
野花隨處發官柳著行新  
天際傷愁別離筵何太頻

泛江送魏十八倉曹還京因寄岑中允參范郎中

李明

金史五卷之三  
卷三十  
遲日深江水輕舟送別筵帝鄉愁緒外春色淚痕邊見  
酒須相憶將詩莫浪傳若逢岑與范為報各衰年

泛江送客

二月頻送客東津江欲平煙花山際重舟楫浪前輕淚  
逐勸盃下愁連吹笛生離筵不隔日那得易為情

上牛頭寺

青山意不盡袞袞上牛頭無復能拘礙真成浪出遊花  
濃春寺靜竹細野池幽何處鶯啼切移時獨未休

望牛頭寺

牛頭見鶴林梯逕繞幽深  
春色浮山外天河宿殿陰  
傳燈無白日布地有黃金  
休作狂歌老迴看不住心

上兜率寺

兜率知名寺真如會法堂  
江山有巴蜀棟宇自齊梁  
庾信哀雖久何顯好不忘  
白牛車遠近且欲上慈航

望兜率寺

樹密當山徑江深隔寺門  
霏霏雲氣重閃閃浪花翻  
不

復知天大空餘見佛尊時應清盥罷隨喜給孤園

數陪李梓州泛江有女樂在諸舫戲為艷曲二首

贈李

上客迴空騎佳人滿近船江清歌扇底野曠舞衣前五  
袖凌風並金壺隱浪偏競將明媚色偷眼艷陽天

白日移歌袖清霄近笛牀翠眉縈度曲雲鬢儼分行立  
馬千山暮迴舟一水香使君自有婦莫學野鴛鴦

登牛頭山亭子

路出雙林外亭窺萬井中江城孤照日山谷遠含風兵  
革身將老關河信不通猶殘數行淚忍對百花叢

陪李梓州王闍州蘇遂州李果州四使君登惠義

寺

春日無人境虛空不住天鶯花隨世界樓閣寄山巔遲  
暮身何得登臨意惘然誰能解金印瀟灑共安禪

江亭送眉州辛別駕昇之

柳影含雲幕江波近酒壺異方驚會面終宴惜征途沙



晚低風蝶天晴喜浴鳧別離傷老大意緒日荒蕪

戲題寄上漢中王

西漢親王子成都老客星百年雙白鬢一別五秋螢忍  
斷盃中物祇看座右銘不能隨卓蓋自醉逐浮萍

倦夜

竹涼侵卧內野月滿庭隅重露成涓滴稀星乍有無暗  
飛螢自照水宿鳥相呼萬事干戈裏空悲清夜徂

悲秋

涼風動萬里羣盜尚縱橫家遠傳書日秋來為客情愁  
窺高鳥過老逐衆人行始欲投三峽何由見兩京

對雨

莽莽天涯雨江邊獨立時不愁巴道路恐濕漢旌旗雪  
嶺防秋急繩橋戰勝遲西戎甥舅禮未敢背恩私

王命

漢北豺狼滿巴西道路難血埋諸將甲骨斷使臣鞍牢  
落新燒棧蒼茫舊築壇深懷喻蜀意慟哭望王官

有感

將帥蒙恩澤兵戈有歲年至今勞聖主何以報皇天白  
骨新交戰雲臺舊拓邊乘槎斷消息無處覓張騫

幽薊餘虵豕乾坤尚虎狼諸侯春不貢使者日相望慎  
勿吞青海無勞問越裳大君先息戰歸馬華山陽

洛下舟車入天中貢賦均日聞紅粟腐寒待翠華春莫  
取金湯固長令宇宙新不過行儉德盜賊本王臣

丹桂風霜急青梧日夜凋由來強幹地未有不臣朝受

鉞親賢往卑宮制詔遙終依古封建豈獨聽簫詔  
盜滅人還亂兵殘將自疑登壇名絕假報主爾何遲領  
郡輒無色之官皆有詞願聞哀痛詔端拱問瘡痍

送元二適江左

亂後今相見秋深復遠行風塵為客日江海送君情  
晉室丹陽尹公孫白帝城經過自愛惜取次莫論兵

章梓州水亭

時漢中王蕪道士席  
謙在會同用荷字韻

城晚通雲霧亭深到芰荷吏人橋外少秋水席邊多近

屬淮王至高門薊子過荊州愛山簡吾醉亦長歌

翫月呈漢中王

夜深露氣清江月滿江城浮客轉危坐歸舟應獨行關  
山同一照烏雀自多驚欲得淮王術風吹暈已生

遣憤

聞道花門將論功未盡歸自從收帝里誰復總戎機蜂  
蠆終懷毒雷霆可振威莫令鞭血地再濕漢臣衣

薄暮

江水長流地山雲薄暮時  
寒花隱亂草宿鳥擇深枝  
舊國見何日高秋心苦悲  
人生不再好鬢髮白成絲

### 西山

尋界荒山頂蕃州積雪邊  
築城依白帝轉粟上青天  
蜀將分旗鼓羌兵助井泉  
西南背和好殺氣日相纏

辛苦三城戍長防萬里秋  
煙塵侵火井雨雪閉松州  
風動將軍幕天寒使者裘  
漫山賊營壘迴首得無憂

子弟猶深入關城未解圍  
蠶崖鐵馬瘦灌口米船稀  
辯

金史紀事本末卷三十一  
卷三十一  
士安邊策元戎決勝威今朝烏鵲喜欲報凱歌歸

薄遊

浙浙風生砌團團日隱牆遙空秋雁滅半嶺暮雲長病  
葉多先墜寒花只暫香巴城添淚眼今夜復清光

舍弟占歸草堂檢校聊示此詩

久客應吾道相隨獨爾來孰知江路近頻為草堂迴鷺  
鳴宜長數柴荆莫浪開東林竹影薄臘月更須裁

放船

送客蒼溪縣山寒雨不開直愁騎馬滑故作泛舟迴青  
惜峯巒過黃知橘柚來江流大自在坐穩興悠哉

陪王使君晦日泛江就黃家亭子

山豁何時斷江平不肯流稍知花改岸始驗鳥隨舟結  
東多紅粉歡娛恨白頭非君愛人客晦日更添愁  
有逕金沙軟無人碧草芳野畦連蛺蝶江檻俯鴛鴦日  
晚煙花亂風生錦繡香不須吹急管衰老易悲傷

南征



金  
卷三十  
春岸桃花水雲帆楓樹林偷生長避地適遠更霑襟老  
病南征日君恩北望心百年歌自苦未見有知音

春遠

肅肅花絮晚菲菲紅素輕日長唯鳥雀春遠獨柴荆數  
有關中亂何曾劍外清故鄉歸不得地入亞夫營

暮寒

霧隱平郊樹風含廣岸波沉沉春色靜慘慘暮寒多戍  
鼓猶長擊林鶯遂不歌忽思高宴會朱袖拂雲和

百舌

百舌來何處重重祇報春知音兼衆語整翮豈多身花  
密藏難見枝高聽轉新過時如發口君側有讒人

游子

巴蜀愁誰語吳門興杳然九江春草外三峽暮帆前厭  
就成都卜休為吏部眠蓬萊如可到衰白問羣仙

滕王亭子

寂寞春山路君王不復行古牆猶竹色虛閣自松聲鳥

雀荒村暮雲霞過客情尚思歌吹入千騎把霓旌

玉臺觀

浩劫因王造平臺訪古遊綵雲蕭史駐文字魯恭留宮  
闕通羣帝乾坤到十洲人傳有笙鶴時過此山頭

送韋郎司直歸成都

竄身來蜀地同病得韋郎天下干戈滿江邊歲月長別  
筵花欲暮春日鬢俱蒼為問南溪竹抽梢合過牆

別房太尉墓

他鄉復行役駐馬別孤墳近淚無乾土低空有斷雲對  
碁陪謝傳把劍覓徐君唯見林花落鶯啼送客聞

自閬州領妻子却赴蜀山行

汨汨避羣盜悠悠經十年不成向南國復作遊西川物  
役水虛照魂傷山寂然我生無倚著盡室畏途邊

長林偃風色迴復意猶迷衫裛翠微潤馬銜青草嘶棧  
懸斜避石橋斷却尋溪何日干戈盡飄飄愧老妻

行色遞隱見人煙時有無僕夫穿竹語稚子入雲呼轉

石驚魑魅抨弓落狄魍真供一笑樂似欲慰窮途

山館

南國晝多霧北風天正寒路危行木杪身遠宿雲端山  
鬼吹燈滅厨人語夜闌雞鳴問前館世亂敢求安

倚杖

看花雖郭內倚杖即溪邊山縣早休市江橋春聚船狎  
鷗輕白浪歸雁喜青天物色兼生意淒涼憶去年

舟前小鷺兒

鷺兒黃似酒對酒愛新鵝引頸嗔船逼無行亂眼多翅  
開遭宿雨力小困滄波客散層城暮狐狸奈若何

歸來

客裏有所過歸來知路難開門野鼠走散帙壁魚乾洗  
杓開新醞低頭拭小盤憑誰給麴蘖細酌老江干

過故斛斯校書莊

此老已云歿鄰人歎未休竟無宣室名徒有茂陵求妻  
子寄他食園林非昔遊空堂總帷在浙浙野風秋

燕入非傍舍鷗歸祇故池  
斷橋無復板卧柳自生枝  
遂有山陽作多慙鮑叔知  
素交零落盡白首淚雙垂

送舍弟頴赴齊州

岷嶺南蠻北徐關東海西  
此行何日到送汝萬行啼  
絕域惟高枕清風獨杖藜  
危時暫相見衰白意都迷

風塵暗不開汝去幾時來  
兄弟分離苦形容老病催  
江通一柱觀日落望鄉臺  
客意長東北齊州安在哉

諸姑今海畔兩弟亦山東  
去傍干戈覓來看道路  
通短

衣防戰地匹馬逐秋風莫作俱流落長瞻碣石鴻

嚴鄭公宅同咏竹

綠竹半含籜新梢纔出牆色侵書帙晚陰過酒樽涼雨  
洗娟娟淨風吹細細香但令無剪伐會見拂雲長

正月三日歸溪上有作簡院內諸公

野外堂依竹籬邊水向城蟻浮仍臘味鷗泛已春聲藥  
許鄰人斲書從稚子擎白頭趨幕府深覺負平生

春日江村



農務村村急春流岸岸深乾坤萬里眼時序百年心茅  
屋還堪賦桃源自可尋艱難賤生理飄泊到如今

種竹交加翠栽桃爛漫紅經心石鏡月到面雪山風赤  
管隨王命銀章付老翁豈知牙齒落名玷薦賢中

哭嚴僕射歸櫬

素幔隨流水歸舟返舊京老親如宿昔部曲異平生風  
送蛟龍匣天長驃騎營一哀三峽暮遺後見君情

宴戎州楊使君東樓

勝絕驚身老情忘發興竒座從歌妓密樂任主人為重  
碧拈春酒輕紅擘荔枝樓高欲愁思橫笛未休吹

渝州候嚴六侍御不到先下峽

聞道乘驄發沙邊待至今不知雲雨散虛費短長吟山  
帶烏蠻闊江連白帝深船經一柱觀留眼共登臨

禹廟

禹廟空山裏秋風落日斜荒庭垂橘柚古屋畫龍蛇雲  
氣生虛壁江聲走白沙早知乘四載疏鑿控三巴

題忠州龍興寺所居院壁

忠州三峽內井邑聚雲根  
小市常爭米孤城早閉門  
空看過客淚莫覓主人恩  
淹泊仍愁虎深居賴獨園

旅夜書懷

細草微風岸危檣獨夜舟  
星垂平野闊月湧大江流  
名豈文章著官應老病休  
飄飄何所似天地一沙鷗

懷錦水居止

軍旅西征僻風塵戰伐多  
猶聞蜀父老不忘舜謳歌  
天

險終難立柴門豈重過朝朝巫峽水遠逗錦江波  
萬里橋南宅百花潭北莊層軒昏面水老樹飽經霜雪  
嶺界天白錦城曛日黃惜哉形勝地回首一茫茫

老病

老病巫山裏稽留楚客中藥殘他日裏花發去年叢夜  
足霑沙雨春多逆水風合分雙賜筆猶作一飄蓬

南楚

南楚青春異暄寒早早分無名江上草隨意嶺頭雲正

月峰相見非時鳥共聞杖藜妨躍馬不是故離羣

移居夔州郭

伏枕雲安縣遷居白帝城春知催柳別江與放船清農  
事聞人說山光見鳥情禹功饒斷石且就土微平

船下夔州郭宿雨濕不得上岸別王十二判官

依沙宿舸船石瀨月娟娟風起春燈亂江鳴夜雨懸晨  
鐘雲外濕勝地石堂煙柔櫓輕鷗外含悽覺汝賢

宿江邊閣

暝色延山逕高齋次水門薄雲巖際宿孤月浪中翻  
鶴追飛靜豺狼得食喧不眠憂戰伐無力正乾坤

不離西閣

江柳非時發江花冷色頻地偏應有瘴臘近已含春失  
學從愚子無家住老身不知西閣意肯別定留人

西閣夜

恍惚寒山暮逶迤白霧昏山虛風落石樓靜月侵門擊  
柝可憐子無衣何處村時危關百慮盜賊爾猶存

入宅

亂後居難定春歸客未還水生魚復浦雲暖麝香山半  
頂梳頭白過眉拄杖斑相看多使者一一問函關

暮春題灤西新賃草屋

久嗟三峽客再與暮春期百舌欲無語繁花能幾時谷  
虛雲氣薄波亂日華遲戰伐何由定哀傷不在茲

此邦千樹橘不見比封君養拙干戈際全生麋鹿羣畏  
人江北草旅食灤西雲萬里巴渝曲三年實飽聞

綵雲陰復白錦樹曉來青身世雙蓬鬢乾坤一草亭哀  
歌時自短醉舞為誰醒細雨荷鋤立江猿吟翠屏

秋野

秋野日疏蕪寒江動碧虛繫舟蠻井絡卜宅楚村墟東  
熟從人打葵荒欲自鋤盤飧老夫食分減及溪魚

易識浮生理難教一物違水深魚極樂林茂鳥知歸吾  
老甘貧病榮華有是非秋風吹几杖不厭此山薇

禮樂攻吾短山林引興長掉頭紗帽仄曝背竹書光風



落收松子天寒割蜜房  
稀疎小紅翠駐屐近微香

遠岸秋沙白連山晚照紅  
潛鱗輸駭浪歸翼會高風  
砧

響家家發樵聲箇箇同  
飛霜任青女賜被隔南宮

身許麒麟畫年衰鴛鴦群  
大江秋易盛空峽夜多聞  
逕

隱千重石帆留一片雲  
兒童解蠻語不必作參軍

溪上

峽內淹留客溪邊四五家  
古苔生窄地秋竹隱疎花  
塞俗人無井山田飯有沙  
西江使船至時復問京華

課小豎鉏斫舍北果林枝蔓荒穢淨訖移牀

病枕依茅棟荒鉏淨果林背堂資僻遠在野興清深山  
雉防求敵江猿應獨吟洩雲高不去隱几亦無心

衆壑生寒早長林卷霧齊青蟲懸就日朱果落封泥薄  
俗防人面全身學馬蹄吟詩坐迴首隨意葛巾低

籬弱門何向沙虛岸只摧日斜魚更食客散鳥還來寒  
水光難定秋山響易哀天涯稍曛黑倚杖更徘徊

東屯北嶼

盜賊浮生困誅求異俗貧空村  
唯見鳥落日未逢人步  
壑風吹面看松露滴身遠山迴  
白首戰地有黃塵

刈稻了咏懷

稻穫空雲水川平對石門  
寒風疎落木旭日散雞豚  
野哭初聞戰戰樵歌稍出村  
無家問消息作客信乾坤

白帝城樓

江度寒山閣城高絕塞樓翠屏  
宜晚對白谷會深遊  
急能鳴雁輕輕不下鷗  
彝陵春色起漸擬放扁舟

峽隘

聞說江陵府雲沙靜眇然白魚如切玉朱橘不論錢水  
有遠湖樹人今何處船青山各在眼却望峽中天

峽口

時清關失險世亂戟如林去矣英雄事荒哉割據心蘆  
花留客晚楓樹坐猿深疲苾煩親故諸侯數賜金

瞿塘兩崖

三峽傳何處雙崖壯此門入天猶石色穿水忽雲根猿

攬鬚鬚古蛟龍窟宅尊羲和冬馭近愁畏日車翻

洞房

洞房環珮冷玉殿起秋風秦地應新月龍池滿舊宮繫  
舟今夜遠清漏往時同萬里黃山北園陵白露中

宿昔

宿昔青門裏蓬萊仗數移花嬌迎雜樹龍喜出平池落  
日留王母微風倚少兒宮中行樂秘少有外人知

鬪雞

鬪雞初賜錦舞馬既登牀簾下宮人出樓前御柳長仙  
遊終一闕女樂久無香寂寞驪山道清秋草木黃

鸚鵡

鸚鵡含愁思聰明憶別離翠衿渾短盡紅背漫多知未  
有開籠日空殘舊宿枝世人憐復損何用羽毛奇

歷歷

歷歷開元事分明在眼前無端盜賊起忽已歲時遷巫  
峽西江外秦城北斗邊為郎從白首卧病數秋天

驪山

驪山絕望幸花萼罷登臨  
地下無朝燭人間有賜金  
湖龍去遠銀海雁飛深  
萬歲蓬萊日長懸舊羽林

草閣

草閣臨無地柴扉永不關  
魚龍迴夜水星月動秋山  
久露晴初濕高雲薄未還  
汎舟慚小婦飄泊損紅顏

江月

江月光於水高樓思殺人  
天邊長作客老去一霑巾玉

露團清影銀河沒半輪誰家挑錦字滅燭翠眉顰

江上

江上日多雨蕭蕭荆楚秋高風下木葉永夜攬貂裘勳業頻看鏡行藏獨倚樓時危思報主衰謝不能休

中夜

中夜江山靜危樓望北辰長為萬里客有媿百年身故國風雲氣高堂戰伐塵胡鷄負恩澤嗟爾太平人

江漢



江漢思歸客乾坤一腐儒片雲天共遠永夜月同孤  
落日心猶壯秋風病欲蘇古來存老馬不必取長途

吾宗

吾宗老孫子質樸古人風耕鑿安時論衣冠與世同在  
家常早起憂國願年豐語及君臣際經書滿腹中

中宵

西閣百尋餘中宵步綺疏飛星過水白落月動沙虛  
擇木知幽鳥潛波想巨魚親朋滿天地兵甲少來書

秋清

高秋蘇肺氣白髮自能梳  
藥餌憎加減門庭悶掃除  
杖藜還客拜愛竹遣兒書  
十月江平穩輕舟進所如

耳聾

生年鶻冠子歎世鹿皮翁  
眼復幾時暗耳從前月聾  
猿鳴秋淚缺雀噪晚愁空  
黃落驚山樹呼兒問朔風

獨坐

竟日雨冥冥雙崖洗更青  
水花寒落岸山鳥暮過庭  
暖

老須燕玉充饑憶楚萍胡笳在樓上哀怨不堪聽  
白狗斜臨北黃牛更在東峽雲常照夜江月會兼風曬  
藥安垂老應門試小童亦知行不逮苦恨耳多聾

晴

久雨巫山暗新晴錦繡文碧知湖外草紅見海東雲竟  
日鶯相和摩霄鶴數羣野花乾更落風處急紛紛

月

斷續巫山雨天河此夜新若無青嶂月愁殺白頭人

題

魍移深樹蝦蟆動半輪故園當北斗直指照西秦  
併照巫山出新窺楚水清羈棲愁裏見二十四迴明必  
驗升沉體如知進退情不違銀漢落亦伴玉繩橫  
萬里瞿塘峽春來六上絃時時開暗室故故滿青天爽  
合風襟靜高當淚臉懸南飛有烏鵲夜久落江邊

夜雨

小雨夜復密迴風吹早秋野涼侵閉戶江滿帶行舟通  
籍恨多病為郎忝薄遊天寒出巫峽醉別仲宣樓

日暮

牛羊下來久各已閉柴門  
風月自清夜江山非故園  
石泉流暗壁草露滴秋根  
頭白燈明裏何須花燼繁

十七夜對月

秋月仍圓夜江村獨老身  
捲簾還照客倚杖更隨人  
光射潛虬動明翻宿鳥頻  
茅齋依橘柚清切露華新

月

四更山吐月殘夜水明樓  
塵匣元開鏡風簾自上鉤  
兔

應疑鶴髮蟾亦戀貂裘斟酌姮娥寡天寒奈九秋

雨

微雨不滑道斷雲疎復行紫崖奔處黑白鳥去邊明秋  
日新霑影寒江舊落聲柴門臨野碓半濕搗香杭

楚雨石苔滋京華消息遲山寒青兕叫江晚白鷗饑神  
女花鈿落蛟人織杼悲繁憂不自整終日灑如絲

夜

絕岸風威動寒房燭影微嶺猿霜外宿江鳥夜深飛獨

坐親雄劍哀歌歎短衣煙塵繞閭闔白首壯心違

曉望

白帝更聲盡陽臺曙色分高峰寒上日疊嶺宿靈雲地  
坼江帆隱天清木葉聞荆扉對麋鹿應共爾為羣

熟食日示宗文宗武

消渴游江漢羈棲尚甲兵幾年逢熟食萬里逼清明松  
栢邛山路風花白帝城汝曹催我老迴首淚縱橫

又示兩兒

令節成吾老他時見汝心  
浮生看物變為恨與年深  
長葛書難得江州涕不禁  
團圓思弟妹行坐白頭吟

九日

舊日重陽日傳盃不放盃  
即今蓬鬢改但愧菊花開  
北闕心長戀西江首獨迴  
茱萸賜朝士難得一枝來

舊與蘇司業兼隨鄭廣文  
采花香泛泛坐客醉紛紛  
野樹欹還倚秋砧醒却聞  
歡娛兩冥莫西北有孤雲

憶鄭南玘



鄭南伏毒寺瀟灑到江心石影銜珠閣泉聲帶玉琴風  
杉曾曙倚雲嶠憶春臨萬里滄浪外龍蛇只自深

悶

瘴癘浮三蜀風雲暗百蠻卷簾唯白水隱几亦青山猿  
捷長難見鷗輕故不還無錢從滯客有鏡巧催顏

戲作俳諧體遣悶

異俗吁可怪斯人難並居家家養烏鬼頓頓食黃魚舊  
識能為態新知已暗疎治生且耕鑿只有不關渠

得舍弟觀書自中都已達江陵今茲暮春月未行  
李合到夔州悲喜相兼團圓可待賦詩即事情  
見乎詞

爾到江陵府何時到峽州亂離生有別聚集病應瘳颯  
颯開啼眼朝朝上水樓老身須付託白骨更何憂

喜觀即到復題短篇

巫峽千山暗終南萬里春病中吾見弟書到汝為人意  
答兒童問來經戰伐新泊船悲喜後款款話歸秦

舍弟觀歸藍田迎新婦送示兩篇

汝去迎妻子高秋念却迴  
即今螢已亂好與雁同來  
東望西江永南遊北戶開  
卜居期靜處會有故人杯

楚塞難為路藍田莫滯留  
衣裳判白露鞍馬信清秋  
滿峽重江水開帆八月舟  
此時同一醉應在仲宣樓

第五弟豐獨在江左近  
三四載寂無消息覓使寄

此

亂後嗟吾在羈棲見汝難  
草黃騏驎病沙晚鵲鴿寒楚

設關城險吳吞水府寬十年朝夕淚衣袖不曾乾  
聞汝依山寺杭州定越州風塵淹別日江漢失清秋影  
著啼猿樹魂飄結蜃樓明年下春水東盡白雲求

季秋蘇五弟纓江樓夜宴崔十三評事韋少府姪  
峽險江驚急樓高月迴明一時今夕會萬里故鄉情星  
落黃姑渚秋辭白帝城老人因酒病堅坐看君傾

對月那無酒登樓況有江聽歌驚白鬢笑舞拓秋窻尊  
蟻添相續沙鷗並一雙盡憐君醉倒更覺片心降

九月一日過孟十二倉曹十四主簿兄弟

藜杖侵寒露蓬門啟曙煙力稀經樹歇老困撥書眠秋  
覺追隨盡來因孝友偏清談見滋味爾輩可忘年

過客相尋

窮老真無事江山已定居地幽忘盥櫛客至罷琴書挂  
壁移筐果呼兒問煮魚時聞繫舟楫及此問吾廬

題栢大兄弟山居屋壁

叔父朱門貴郎君玉樹高山居精典籍文雅涉風騷江

漢終吾老雲林得爾曹  
絃繞白雪未與俗人操  
野屋流寒水山籬帶薄雲  
靜應連虎穴喧已去人羣  
筆架霑窻雨書籤映隙照  
蕭蕭千里足箇箇五花文

秋日寄題鄭監湖上亭

新作湖邊宅還聞賓客過  
自須開竹逕誰道避雲蘿  
官序潘生拙才名賈傅多  
捨舟應卜地鄰接意如何  
暫阻蓬萊閣終為江海人  
揮金應物理拖玉豈吾身  
羹煮秋蓴滑盃迎露菊新  
賦詩分氣象佳句莫頻頻

謁真諦寺禪師

蘭若山高處煙霞嶂幾重凍泉依細石晴雪落長松問  
法看詩妄觀身向酒慵未能割妻子卜宅近前峰

孤雁

孤雁不飲啄飛鳴聲念羣誰憐一片影相失萬重雲望  
盡似猶見哀多如更聞野鷓無意緒鳴噪自紛紛

白小

白小羣分命天然二寸魚細微露水族風俗當園蔬入

肆銀花亂傾箱雪片虛生成猶拾卵盡取義何如

鹿

永與清溪別蒙將玉饌俱無才逐仙隱不敢恨庖廚亂  
世輕全物微聲及禍樞衣冠兼盜賊饕餮用斯須

人日

元日到人日未有不陰時冰雪鶯難至春寒花較遲雲  
隨白水落風振紫山悲蓬鬢稀疎久無勞比素絲

江梅



梅蘂臘前破梅花年後多絕知春意好最奈客愁何雪  
樹元同色江風亦自波故園不可見巫岫鬱嵯峨

春夜峽州田侍御長史津亭留宴

北斗三更席西江萬里船杖藜登水榭揮翰宿春天白  
髮煩多酒明星惜此筵始知雲雨峽忽盡下牢邊

泊松滋江亭

紗帽隨鷗鳥扁舟繫此亭江湖深更白松竹遠微青一  
柱全應近高唐莫再經今宵南極外甘作老人星

上巳日徐司錄林園宴集

鬢毛垂領白花蘂亞枝紅歆倒衰年廢招尋令節同薄  
衣臨積水吹面受和風有喜留攀桂無勞問轉蓬

夏日楊長寧宅送崔侍御常正字入京

醉酒楊雄宅升堂子賤琴不堪垂老鬢還對欲分襟天  
地西江遠星辰北斗深烏臺俯麟閣長夏白頭吟

官亭夕坐戲簡顏十少府

南國調寒杵西江浸日車客愁連蟋蟀亭古帶蒹葭不

返青絲鞵虛燒夜燭花老翁須地主細細酌流霞

公安縣懷古

野曠呂蒙營江深劉備城寒天催日短風浪與雲平灑  
落君臣契飛騰戰伐名維舟倚前浦長嘯一含情

公安送李二十九弟晉肅入蜀余下沔鄂

正解柴桑纜仍看蜀道行檣烏相背發塞雁一行鳴南  
紀連銅柱西江接錦城憑將百錢卜飄泊問君平

宴王使君宅

汎愛容霜髮留歡上夜闌自吟詩送老相勸酒開顏戎  
馬今何地鄉園獨舊山江湖墮清月酌酹任扶還

登岳陽樓

昔聞洞庭水今上岳陽樓吳楚東南坼乾坤日夜浮親  
朋無一字老病有孤舟戎馬關山北憑軒涕泗流

宿白沙驛

水宿仍餘照人煙復此亭驛邊沙舊白湖外草新青萬  
象皆春氣孤槎自客星隨波無限月的的近南溟

祠南夕望

百丈牽江色，孤舟泛日斜。  
興來猶杖屨，目斷更雲沙。  
山鬼迷春竹，湘娥倚暮花。  
湖南清絕地，萬古一長嗟。

野望

納納乾坤大，行行郡國遙。  
雲山兼五嶺，風壤帶三苗。  
野樹侵江濶，春蒲長雪消。  
扁舟空老去，無補聖明朝。

暮秋將歸秦留別湖南幕府親友

水濶蒼梧野，天高白帝秋。  
途窮那免哭，身老不禁愁。  
大

府才能會諸公德業優北歸衝雨雪誰憫弊貂裘

舟中夜雪有懷盧十四侍御弟

朔風吹桂水朔雪夜紛紛暗度南樓月寒深北渚雲  
斜初近見舟重竟無聞不識山陰道聽雞更憶君

對雪

北雪犯長沙胡雲冷萬家隨風且間葉帶雨不成花  
錯囊從罄銀壺酒易賒無人竭浮蟻有待至昏鴉

樓上

全  
卷三十  
天地空搔首頻抽白玉簪  
皇輿三極北身事五湖南  
戀闕勞肝肺論材媿杞柵  
亂離難自救終是老湘潭

發潭州

夜醉長沙酒曉行湘水春  
岸花飛送客檣燕語留人賈  
傅才未有褚公書絕倫高名  
前後事回首一傷神

衡州送李大夫七丈勉赴廣州

斧鉞下青冥樓船過洞庭  
北風隨爽氣南斗避文星  
日月籠中鳥乾坤水上萍  
王孫丈人行垂老見飄零

舟泛洞庭

蛟室圍青草龍堆擁白沙  
護江盤古木迎櫂舞神鷄  
破浪南風正收颿畏日斜  
雲山千萬疊底處上仙槎

李鹽鐵

落葉春風起高城煙霧開  
雜花分戶映嬌燕入簷回  
一見能傾座虛懷只愛才  
鹽官雖絆驥名是漢庭來

巴西驛亭觀江漲呈竇使君

向晚波微綠連空岸脚青  
日兼春有暮愁與醉無醒  
漂



泊猶杯酒躊躇此驛亭相看萬里外同是一浮萍

巴西聞收宮闕送班司馬入京


聞道收宗廟鳴鑾自陝歸傾都看黃屋正殿引朱衣  
外春天遠巴西勅使稀念君經世亂匹馬向王畿

去蜀

五載客蜀郡一年居梓州如何關塞阻轉作瀟湘遊  
事已黃髮殘生隨白鷗安危大臣在不必淚長流

放船

收帆下急水卷幔逐回灘  
江市戎戎暗山雲淦淦寒  
村荒無徑入獨鳥怪人看  
已泊城樓底何曾夜色闌



御定全唐詩錄卷三十

欽定四庫全書

御定全唐詩錄卷三十一

集部

詳校官左中允<sub>臣</sub>璿五珠

主事銜<sub>臣</sub>徐以坤覆勘

總校官原任中允<sub>臣</sub>王燕緒

校對官中書<sub>臣</sub>嵇承志

謄錄監生<sub>臣</sub>胡宗高

欽定四庫全書

御定全唐詩錄卷三十一

杜甫

近體詩三

冬日洛城北謁玄元皇帝廟

配極玄都闕，憑虛禁御長。  
守桃嚴具禮，掌節鎮非常。  
碧瓦初寒外，金莖一氣旁。  
山河扶繡戶，日月近雕梁。  
仙李盤根大，猗蘭奕葉光。  
世家遺舊史，道德付今王。  
盡手看

前輩吳生遠擅場森羅移地軸妙絕動宮牆五聖聯龍  
袞千官列雁行冕旒俱秀發旌旆盡飛揚翠栢深留景  
紅梨迴得霜風箏吹玉柱露井凍銀牀身退卑周室經  
傳拱漢皇谷神如不死養拙更何鄉

投贈哥舒開府二十韻

今代麒麟閣何人第一功君王自神武駕馭必英雄開  
府當朝傑論兵邁古風先鋒百勝在略地兩隅空青海  
無傳箭天山早挂弓廉頗仍走敵魏絳已和戎每惜河

湟棄新兼節制通智謀垂睿想出入冠諸公日月低秦  
樹乾坤繞漢宮胡人愁逐北宛馬又從東受命邊沙遠  
歸來御席同軒墀曾寵鶴畋獵舊非熊茅土加名數山  
河誓始終策行遺戰伐契合動昭融勲業青冥上交親  
氣槩中未為朱履客已見白頭翁壯節初題柱生涯獨  
轉蓬幾年春草歇今日暮途窮軍事留孫楚行間識呂  
蒙防身一長劍將欲倚崆峒

上韋左相二十韻

鳳歷軒轅紀龍飛四十春八荒開壽域一氣轉洪鈞霖  
雨思賢佐丹青憶老臣應圖求駿馬驚代得麒麟沙汰  
江河濁調和鼎鼐新韋賢初相漢范叔已歸秦盛業今  
如此傳經固絕倫豫樟深出地滄海闊無津北斗司喉  
舌東方領摺紳持衡留藻鑑聽履上星辰獨步才超古  
餘波德照鄰聰明過管輅尺牘倒陳遵豈是池中物由  
來席上珍廟堂知至理風俗盡還淳才傑俱登用愚蒙  
但隱淪長卿多病久子夏索居頻回首驅流俗生涯似



衆人巫咸不可問鄒魯莫容身  
感激時將晚蒼茫興有神  
神為公歌此曲涕淚在衣巾

奉贈太常張卿珣二十韻

方丈三韓外崑崙萬國西  
建標天地濶詣絕古今迷  
氣得神仙迴恩承雨露低  
相門清議衆儒術大名齊  
軒冕羅天闕琳瑯識介珪  
伶官詩必誦夔樂典猶稽  
健筆凌鸚鵡銛鋒瑩鷓鴣  
友于皆挺拔公望各端倪  
通籍踰青瑣亨衢照紫泥  
靈虬傳夕箭歸馬散霜蹄  
能事聞重譯

嘉暮及遠黎弼諧方一展班序更何躋適越空顛躑遊  
梁竟慘悽謬知終畫虎微分是醯雞萍泛無休日桃陰  
想舊蹊吹噓人所羨騰躍事仍睽碧海真難涉青雲不  
可梯顧深慙鍛鍊才小辱提攜檻束哀猿叶枝驚夜鵲  
棲幾時陪羽獵應指釣璜溪

敬贈鄭諫議十韻

諫官非不達詩義早知名破的由來事先鋒孰敢爭思  
飄雲物外律中鬼神驚毫髮無遺恨波瀾獨老成野人

寧得所天意薄浮生多病休儒服冥搜信客旌築居仙  
縹緲旅食歲崢嶸使者求顏闔諸公厭禰衡將期一諾  
重歛使寸心傾君見途窮哭宜憂阮步兵

奉贈鮮于京兆二十韻

王國稱多士賢良復幾人異才應間出爽氣必殊倫始  
見張京兆宜居漢近臣驂騶開道路雕鷲離風塵侯伯  
知何等文章實致身奮飛超等級容易失沉淪脫略磻  
溪釣操持郢匠斤雲霄今已逼台衮更誰親鳳穴雛皆

好龍門客又新義聲紛感激敗績自逡巡途遠欲何向  
天高難重陳學詩猶孺子鄉賦念嘉賓不得同晁錯呼  
嗟後邳詵計疎疑翰墨時過憶松筠獻納紆皇眷中間  
謁紫宸且隨諸彥集方覲薄才伸破膽遭前政陰謀獨  
秉鈞微生霑忌刻萬事益酸辛交合丹青地恩傾雨露  
辰有儒愁餓死早晚報平津

贈特進汝陽王二十韻

特進羣公表天人夙德升霜蹄千里駿風翻九霄鵬服

禮求毫髮惟忠忘寢興聖情常有眷朝退若無憑仙醴  
來浮蟻竒毛或賜鷹清闈塵不雜中使日相乘晚節嬉  
遊簡平居孝義稱自多親棣萼誰敢問山陵學業醇儒  
富辭華哲匠能筆飛鸞聳立章罷鳳騫騰精理通談笑  
忘形向友朋寸長堪繾綣一諾豈驕矜已忝歸曹植何  
知對李膺招要恩屢至崇重力難勝披霧初歡夕高秋  
爽氣澄樽罍臨極浦鳧雁宿張燈花月窮游宴炎天避  
鬱蒸硯寒金井水簷動玉壺冰瓢飲唯三逕巖棲在百

層且持蠡測海況挹酒如澠鴻寶寧全秘丹梯庶可凌  
淮王門有客終不媿孫登

奉寄河南韋尹丈人

有客傳河尹逢人問孔融青囊仍隱逸章甫尚西東  
鼎食分門戶詞塲繼國風尊榮瞻地絕疎放憶途窮濁酒  
尋陶令丹砂訪葛洪江湖漂襖褐霜雪滿飛蓬牢落乾  
坤大周流道術空謬慙知薊子真怯笑揚雄盤錯神明  
懼謳歌德義豐尸鄉餘土室誰話閒雞翁

與李十二白同尋范十隱居

李侯有佳句往往似陰鏗余亦東蒙客憐君如弟兄醉  
眠秋共被攜手日同行更想幽期處還尋北郭生入門  
高興發侍立小童清落景聞寒杵屯雲對古城向來吟  
橘頌誰欲討蓴羹不願論簪笏悠悠滄海情

臨邑舍弟書至苦雨黃河泛溢隄防之患簿領所  
憂因寄此詩用寬其意

二儀積風雨百谷漏波濤聞道洪河圻遙連滄海高職

思憂悄悄郡國訛嗷嗷舍弟卑棲邑防川領簿曹尺書  
前日至版築不時操難假黿鼉力空瞻烏鵲毛燕南吹  
畝畝濟上沒蓬蒿螺蚌滿近郭蛟螭乘九臬徐關深水  
府碣石小秋毫白屋留孤樹青天失萬艘吾衰同泛梗  
利涉想蟠桃倚賴天涯釣猶能掣巨鰲

送蔡希曾都尉還隴右因寄高三十五書記

蔡子勇成癖彎弓西射胡健兒寧鬪死壯士恥為儒官  
是先鋒得材緣挑戰須身輕一鳥過槍急萬人呼雲幕



隨開府春城赴上都馬頭金匱匝駝背錦模糊咫尺雪  
山路歸飛青海隅上公猶寵錫突將且前驅漢使黃河  
遠涼州白麥枯因君問消息好在阮元瑜

贈翰林張四學士垧

翰林逼華蓋鯨力破滄溟天上張公子宮中漢客星賦  
詩拾翠殿佐酒望雲亭紫誥仍兼綰黃麻似六經內分  
金帶赤恩與荔枝青無復隨高鳳空餘泣聚螢此生任  
春草垂老獨漂萍儻憶山陽會悲歌在一聽

遣興

驥子好男兒前年學語時  
問知人客姓誦得老夫詩  
世亂憐渠小家貧仰母慈  
鹿門攜不遂雁足繫難期  
天地軍麾滿山河戰角悲  
儻歸免相失見日敢辭遲

得家書

去憑遊客寄來為附家書  
今日知消息他鄉且舊居  
熊兒幸無恙驥子最憐渠  
臨老羈孤極傷時會合疎  
二毛趨帳殿一命侍鸞輿  
北闕妖氛滿西郊白露初  
涼風新

過雁秋雨欲生魚農事空山裏眷言終荷鋤

奉送郭中丞兼太僕卿充隴右節度使三十韻

詔發西山將秋屯隴右兵淒涼餘部曲輝赫舊家聲  
雕鷲乘時去驂駟顧主鳴艱難須上策容易即前程  
斜日當軒蓋高風卷旆旌松悲天水冷沙亂雪山清  
和虜猶懷惠防邊不敢驚古來於異域鎮靜示專征  
燕薊奔封豕周秦觸駭鯨中原何慘黷餘孽尚縱橫  
箭入昭陽殿笳吟細柳營內人紅裏泣王子白衣行  
宸極祆星動園

陵殺氣平空餘金椀出無復總帷輕毀廟天飛雨焚宮  
火徹明罍罍朝共落榆栢夜同傾三月師逾整羣兇勢  
就烹瘡痍親接戰勇決冠垂成妙譽期元宰殊恩且列  
御幾時迴節鉞戮力掃欃槍圭竇三千士雲梯七十城  
恥非齊說客祇似魯諸生通籍微班忝周行獨坐榮隨  
肩趨漏刻短髮寄簪纓徑欲依劉表還疑厭禰衡漸衰  
那此別忍淚獨含情廢邑狐狸語空村虎豹爭人頻墜  
塗炭公豈忘精誠元帥調新律前軍壓舊京安邊仍慮

從莫作後功名

送楊六判官使西蕃

送遠秋風落西征海氣寒帝京氛祲滿人世別離難絕  
域遙懷怒和親願結歡勅書憐贊普兵甲望長安宣命  
前程急惟良待士寬子雲清自守今日起為官垂淚方  
投筆傷時即據鞍儒衣山鳥怪漢節野童看邊酒排金  
盞夷歌捧玉盤草肥蕃馬健雪重拂廬乾慎爾參籌畫  
從茲正羽翰歸來權可取九萬一朝搏

行次昭陵

舊俗疲庸主羣雄問獨夫  
讖歸龍鳳質威定虎狼都  
天屬尊堯典神功協禹謨  
風雲隨絕足日月繼高衢  
文物多師古朝廷半老儒  
直詞寧戮辱賢路不崎嶇  
往者災猶降蒼生喘未蘇  
指麾安率土盪滌撫洪鑪  
壯士悲陵邑幽人拜鼎湖  
玉衣晨自舉鐵馬汗常趨  
松柏瞻虛殿塵沙立暝途  
寂寥開國日流恨滿山隅

重經昭陵

草昧英雄起謳歌歷數歸風塵三尺劍社稷一戎衣翼  
亮貞文德丕承戢武威聖圖天廣大宗祀日光輝陵寢  
盤空曲熊羆守翠微再窺松柏路遠見五雲飛

喜聞官軍已臨賊寇二十韻

胡騎潛京縣官軍擁賊壕鼎魚猶假息穴蟻欲何逃帳  
殿羅玄冕棘門照白袍秦山當警蹕漢苑入旌旄路失  
羊腸險雲橫雉尾高五原空壁壘八水散風濤今日看  
天意遊魂貸爾曹乞降那更得尚詐莫徒勞元帥歸龍

種司空握豹韜前軍蘇武節左將呂虔刀兵氣回飛鳥  
威聲沒巨鼇戈鋌開雪色弓矢尚秋毫天步艱方盡時  
和運更遭誰云遺毒螫已是沃腥臊睿想丹墀近神行  
羽衛牢花門騰絕漠拓羯渡臨洮此輩感恩至羸倖何  
足操鋒先衣染血騎突劍吹毛喜覺都城動悲憐子女  
號家家賣釵劍只待獻春醪

鄭駙馬池臺喜遇鄭廣文同飲

不謂生戎馬何知共酒盃然臍郿塢敗握節漢臣回白



髮千莖雪丹心一寸灰  
別離經死地披寫忽登臺  
重對秦簫發俱過阮宅來  
留連春夜舞淚落強徘徊

送許八拾遺歸江寧觀省甫昔時常客遊此縣於

許生處乞瓦棺寺維摩圖像志諸篇末

詔許辭中禁慈顏赴北堂  
聖朝新孝理祖席倍輝光  
內帛驚偏重宮衣著更香  
淮陰清夜驛京口渡江航  
春隔雞人晝秋期燕子涼  
賜書誇父老壽酒樂城隍  
看盡曾饑渴追蹤恨淼茫  
虎頭金粟影神妙獨難忘

寄彭州高三十五使君適虢州岑二十七長史參

三十韻

故人何寂寞今我獨淒涼老去才難盡秋來興甚長  
物情尤可見辭客未能忘海內知名士雲端各異方  
高岑殊緩步沈鮑得同行意愜關飛動篇終接混茫  
舉天悲富賂近代惜盧王似爾官仍貴前賢命可傷  
諸侯非棄擲半刺已翱翔詩好幾時見書成無信將  
男兒行處是客子鬪身強羈旅推賢聖沉綿抵咎殃  
三年猶瘧疾一

鬼不銷亡隔日搜脂髓增寒抱雪霜徒然潛隙地有靦  
屢鮮妝何太龍鍾極于今出處妨無錢居帝里盡室在  
邊疆劉表雖遺恨龐公至死藏心徹傍魚鳥肉瘦怯豺  
狼隴草蕭蕭白洮雲片片黃彭門劍閣外號略鼎湖旁  
荆玉簪頭冷巴牋染翰光烏麻蒸續曬丹橘露應嘗豈  
異神仙宅俱兼山水鄉竹齋燒藥竈花嶼讀書牀更得  
清新否遙知對屬忙舊官寧改漢淳俗本歸唐濟世宜  
公等安貧亦士常虫尤終戮辱羌羯漫猖狂會待祆氛

靜論文暫裹糧

寄岳州賈司馬六丈巴州嚴八使君兩閣老五十

韻

衡岳啼猿裏巴州鳥道邊故人俱不利謫宦兩悠然開  
闢乾坤正榮枯雨露偏長沙才子遠釣瀨客星懸憶昨  
趨行殿殷憂捧御筵討胡愁李廣奉使待張騫無復雲  
臺仗虛修水戰船蒼茫城七十流落劍三千畫角吹秦  
晉旄頭俯澗瀝小儒輕董卓有識笑苻堅浪作禽填海

那將血射天萬方思助順一鼓氣無前陰散陳倉北晴  
熏太白巔亂麻屍積衛破竹勢臨燕法駕還雙闕王師  
下八川此時霑奉引佳氣拂周旋貔虎開金甲麒麟受  
玉鞭侍臣諳入仗廐馬解登仙花動朱樓雪城凝碧樹  
煙衣冠心慘愴故老淚潺湲哭廟悲風急朝正霽景鮮  
月分梁漢米春得水衡錢內藥繁于纈宮莎軟勝綿思  
祭同拜手出入最隨肩晚著華堂醉寒重繡被眠轡齊  
兼秉燭書枉滿懷牋每覺昇元輔深期列大賢秉鈞方

咫尺黻翽再聯翽禁掖朋從改微班性命全青蒲甘受  
戮白髮竟誰憐弟子貧原憲諸生老伏虔師資謙未達  
鄉黨敬何先舊好腸堪斷新愁眼欲穿翠乾危棧竹紅  
膩小湖蓮賈筆論孤憤嚴詩賦幾篇定知深意苦莫使  
衆人傳貝錦無停織朱絲有斷絃浦鷗防碎首霜鶻不  
空拳地僻昏炎瘴山稠隘石泉且將碁度日應用酒為  
年典郡終微眇治中實棄捐安排求傲吏比興展歸田  
去去才難得蒼蒼理又玄古人稱逝矣吾道卜終焉隴

外翻投跡漁陽復控弦  
笑為妻子累甘與歲時遷  
親故行稀少兵戈動接聯  
他鄉饒夢寐失侶自迢遼  
多病加淹泊長吟阻靜便  
如公盡雄俊志在必騰騫

寄李十二白二十韻

昔年有狂客號爾謫仙人  
筆落驚風雨詩成泣鬼神  
聲名從此大汨沒一朝伸  
文彩承殊渥流傳必絕倫  
龍舟移棹晚獸錦奪袍新  
白日來深殿青雲滿後塵  
乞歸優詔許遇我宿心親  
未負幽棲志兼全寵辱身  
劇談憐野

逸嗜酒見天真醉舞梁園夜行歌泗水春才高心不展  
道屈善無鄰處士褊衡俊諸生原憲貧稻梁求未足蒼  
苾謗何頻五嶺炎蒸地三危放逐臣幾年遭鵬鳥獨泣  
向麒麟蘇武先還漢黃公宣事秦楚筵辭醴日梁獄上  
書辰已用當時法誰將此義陳老吟秋月下病起暮江  
濱莫怪恩波隔乘槎與問津

奉和嚴中丞西城晚眺十韻

汲黯匡君切庶頗出將頻直詞才不世雄略動如神政



簡移風速詩清立意新層城臨暇景絕域望餘春旗尾  
蛟龍會樓頭燕雀馴地平江動蜀天闊樹浮秦帝念深  
分閫軍須遠筭緡花羅封蛺蝶瑞錦送麒麟辭第輸高  
義觀圖憶古人征南多興緒事業閣相親

傷春

天下兵雖滿春光日自濃西京疲百戰北關任羣兇關  
塞三千里煙花一萬重蒙塵清露急御宿且誰供殷復  
前王道周遷舊國容蓬萊足雲氣應合總從龍

鶯入新年語花開滿故枝天青風捲幔草碧水通池宇  
落官軍速蕭條萬事危鬢毛元自白淚點向來垂不是  
無兄弟其如有別離巴山春色靜北望轉逶迤

日月還相鬪星辰屢合圍不成誅執法焉得變危機大  
角纏兵氣鉤陳出帝畿煙塵昏御道耆舊把天衣行在  
諸軍闕來朝大將稀賢多隱屠釣王肯載同歸

王閬州筵奉酬十一舅惜別之作

萬壑樹聲滿千崖秋氣高浮舟出郡郭別酒寄江濤良

會不復久此生何太勞窮愁但有骨羣盜尚如毛吾舅  
惜分手使君寒贈袍沙頭暮黃鵠失侶自哀號

春歸

苔逕臨江竹茅簷覆地花別來頻甲子歸到又春華倚  
杖看孤石傾壺就淺沙遠鷗浮水靜輕燕受風斜世路  
雖多梗吾生亦有涯此身醒復醉乘興即為家

寄李十四負外布十二韻

新除司議郎兼萬州別駕雖尚伏枕已聞理裝

名叅漢望苑職迷景題輿巫峽將之郡荆門好附書遠

行無自苦內熱比何如正是炎天闊那堪野館疎黃牛  
平駕浪盡鷁上凌虛試待盤渦歇方期解纜初悶能過  
小徑自為摘嘉蔬渚柳元幽僻村花不掃除宿陰繁素  
柰過雨亂紅蕖寂寂夏先晚泠泠風有餘江清心可瑩  
竹冷髮堪梳直作移巾儿秋帆發敝廬

遣悶奉呈嚴公二十韻

白水魚竿客清秋鶴髮翁胡為來幕下祇合在舟中黃  
卷真如律青袍也自公老妻憂坐痺幼女問頭風平地

專敬倒分曹失異同禮甘衰力就義忝上官通疇昔論  
詩早光輝仗鉞雄寬容存性拙剪拂念途窮露裛思藤  
架煙霏想桂叢信然龜觸網直作鳥窺籠西嶺紆村北  
南江遶舍東竹皮寒舊翠椒實雨新紅浪簸船應拆杯  
乾甕即空籬籬生野徑斤斧任樵童束縛酬知己蹉跎  
効小忠周防期稍稍太簡遂忽忽曉入朱扉啟昏歸盡  
角終不成尋別業未敢息微躬烏鵲愁銀漢鴛鴦怕錦  
幃會希全物色時放倚梧桐

奉觀嚴鄭公廳事岷山沱江畫圖十韻

沱水流中座岷山到北堂  
白波吹粉壁青嶂插雕梁  
直訝杉松冷兼疑菱荇香  
雪雲虛點綴沙草得微茫  
嶺雁隨毫末川蛻飲練光  
霏紅洲藥亂拂黛石蘿長  
暗谷非關雨丹楓不為霜  
秋成玄圃外景物洞庭旁  
繪事功殊絕幽襟興激昂  
從來謝太傅丘壑道難忘

東屯月夜

抱疾漂萍老防邊舊穀屯  
春農親異俗歲月在衡門  
青

女霜楓重黃牛峽水喧泥留虎鬪跡月挂客愁村喬木  
澄稀影輕雲倚細根數驚聞雀噪暫睡想猿蹲日轉東  
方白風來北斗昏天寒不成寐無夢寄歸魂

上白帝城

江城含變態一上一回新天欲今朝雨山歸萬古春英  
雄餘事業衰邁久風塵取醉他鄉客相逢故國人兵戈  
猶擁蜀賦斂強輸秦不是煩形勝深慙畏損神

謁先主廟

慘澹風雲會乘時各有人力侔分社稷志屈偃經綸復  
漢留長策中原仗老臣雜耕心未已歐血事酸辛霸氣  
西南歇雄圖歷數屯錦江原過楚劍閣復通秦舊俗存  
祠廟空山泣鬼神虛簷交鳥道枯木半龍鱗竹送清溪  
月苔移玉座春閭閻兒女換歌舞歲時新絕域歸舟遠  
荒城繫馬頻如何對搖落況乃久風塵孰與關張並功  
臨耿鄧親應天才不小得士契無鄰遲暮堪帷幄飄零  
且釣緡向來憂國淚寂寞洒衣巾



諸葛廟

久遊巴子國屢入武侯祠竹日斜虛寢溪風滿薄帷君  
臣當共濟賢聖亦同時翊戴歸先主并吞更出師蟲蛇  
穿盡壁巫覡醉蛛絲歛憶吟梁父躬耕也未遲

偶題

文章千古事得失寸心知作者皆殊列名聲豈浪垂騷  
人嗟不見漢道盛於斯前輩飛騰入餘波綺麗為後賢  
兼舊列歷代各清規法自儒家有心從弱歲疲永懷江

左逸多謝鄴中竒駿皆良馬騏驎帶好兒車輪徒已  
斲堂構惜仍虧漫作潛夫論虛傳幼婦碑緣情慰漂蕩  
抱疾屢遷移經濟慚長策飛棲假一枝塵沙傍蜂蠆江  
峽繞蛟螭蕭瑟唐虞遠聯翩楚漢危聖朝兼盜賊異俗  
更喧卑鬱鬱星辰劍蒼蒼雲雨池兩都開幕府萬寓插  
軍麾南海殘銅柱東風避月支音書恨烏鵲號怒怪熊  
羆稼穡分詩興柴荆學土宜故山迷白閣秋水隱黃陂  
不敢要佳句愁來賦別離

秋日夔府詠懷奉寄鄭監審李賓客之芳一百韻  
絕塞烏蠻北孤城白帝邊飄零仍百里消渴已三年雄  
劍鳴開匣羣書滿繫船亂離心不展衰謝日蕭然筋力  
妻孥問菁華歲月遷登臨多物色陶冶賴詩篇峽東滄  
江起巖排石樹圓拂雲霾楚氣朝海蹴吳天煮井為鹽  
速燒畝度地偏有時驚疊嶂何處覓平川鷓鴣雙舞  
獼猴壘懸碧蘿長似帶錦石小如錢春草何曾歇寒  
花亦可憐獵人吹戍火野店引山泉喚起搔頭急扶行

幾屐穿兩京猶薄產四海絕隨肩幕府初交辟郎官幸  
備負爪時猶旅寓萍泛苦黃緣藥餌虛狼籍秋風灑靜  
便開襟驅瘴癘明目掃雲煙高宴諸侯禮佳人上客前

哀箏傷老大華屋艷神仙南內開元曲常時弟子傳法

歌聲變轉滿座涕潺湲

都督栢中丞筵間  
梨園弟子李仙奴歌

弔影夔州

僻回腸杜曲煎即今龍廐水莫帶犬戎羶耿賈扶王室  
蕭曹拱御筵乘威滅蜂蠆戮力効鷹鷂舊物森猶在  
凶徒惡未悛國須行戰伐人憶止戈鋌奴僕何知禮恩

禁錯與權胡星一彗孛黔首遂拘孿哀痛絲綸切煩苛  
法令蠲業成陳始王兆喜出于畋宮禁經綸密台階翊  
戴全熊罷載呂望鴻雁美周宣側聽中興主長吟不世  
賢音徽一柱數道里下牢千  
鄭在江陵  
李在夷陵鄭李光時論文  
章並我先陰何尚清省沈宋歛聯翩律比崑崙竹音知燥  
濕絃風流俱善價愜當久忘筌置驛常如此登龍蓋有  
焉雖云隔禮數不敢墜周旋高視收人表虛心味道玄  
馬來皆汗血鶴唳必青田羽翼商山起蓬萊漢閣連管

寧紗帽淨江令錦袍鮮東郡時題壁南湖日扣舷遠遊  
凌絕境佳句染華牋每欲孤飛去徒為百慮牽生涯已

寥落國步尚述遭衾枕成蕪沒池塘作棄捐

平生多病  
卜築遣懷

別離憂怛怛伏臘涕漣漣露菊斑艷鎬秋蔬影澗瀍共

誰論昔事幾處有新阡富貴空回首喧爭懶著鞭兵戈

塵漠漠江漢月娟娟局促看秋燕蕭疎聽晚蟬雕蟲蒙

記憶烹鯉問沉綿卜羨君平杖偷存子敬氈囊空把釵

釧米盡圻花鈿甘子陰涼葉茅齋八九椽陣圖沙北岸

市暨瀼西巔

市暨音既峽人目市井處曰市暨八陣圖市暨夔人語也江水橫通山谷處方人謂

之瀼羈絆心常折棲遲病即痊紫收岷嶺芋白種陸池蓮

色好梨勝頰穰多粟過拳勅廚唯一味求飽或三鱸兒

去看魚笥人來坐馬韉

一云俗異鄰蛟室朋來坐馬韉

縛柴門窄窄通

竹溜涓涓塹抵公畦稜

京師農人指田遠近多云幾稜稜音去聲

村依野廟

孺缺籬將棘拒倒石賴藤纏借問頻朝謁何如穩醉眠

誰云行不逮自覺坐能堅霧雨銀章澀馨香粉署妍紫

鷺無近遠黃雀任翩翾困學違從衆明公各勉旃聲華

夾宸極早晚到星躔懇諫留匡鼎諸儒引服虔不過輸  
鯁直會是正陶甄宵旰憂虞軫黎元疾苦駢雲臺終日  
畫青簡為誰編行路難何有招尋興已專由來具飛檝  
甃擬控鳴弦身許雙峰寺門求七祖禪落帆追宿昔衣  
褐向真詮安石名高晉昭王客赴燕途中非阮籍查上  
似張騫披拂雲寧在淹留景不延風期終破浪水怪莫  
飛涎他日辭神女傷春怯杜鵑淡交隨聚散澤國遠迴  
旋本自依迦葉何曾籍倭倭鑪峰生轉盼橘井尚高寨



東走窮歸鶴南征盡點鳶晚聞多妙教卒踐塞前愆顧  
凱丹青列頭陀琬琰鑄衆香深黯黯幾地肅芊芊勇猛  
為心極清羸任體孱金篋空刮眼鏡象未離銓

傷秋

林僻來人少山長去鳥微高秋收畫扇久客掩荆扉懶  
慢頭時櫛艱難帶減圍將軍猶汗馬天子尚戎衣白蔣  
風颼脆殷裡曉夜稀何年減豺虎似有故園歸

宗武生日

小子何時見高秋此日生自從都邑語已伴老夫名詩  
是吾家事人傳世上情熟精文選理休覓綵衣輕凋瘵  
筵初秩歌斜坐不成流霞分片片消滴就徐傾

又示宗武

覓句新知律攤書解滿牀試吟青玉案莫羨紫羅囊假  
日從時飲明年共我長應須飽經術已似愛文章十五  
男兒志三千弟子行曾參與游夏達者得升堂

九日

故里樊川菊登高素澹源他時一笑後今日幾人存  
巫峽蟠江路終南對國門繫舟身萬里伏枕淚雙痕  
為客裁烏帽從兒具綠尊佳辰對羣盜愁絕更誰論

寄韋有夏郎中

省郎憂病士書信有柴胡飲子頻通汗懷君想報珠親  
知天畔少藥味峽中無歸楫生衣卧春鷗洗翅呼猶聞  
上急水早作取平途萬里皇華使為僚記腐儒

太歲日

楚岸行將老巫山坐復春病多猶是客謀拙竟何人閭  
闔開黃道衣冠拜紫宸榮光懸日月賜與出金銀愁寂  
鴛行斷參差虎穴鄰西江元下蜀北斗故臨秦散地逾  
高枕生涯脫要津天邊梅柳樹相見幾迴新

元日示宗武

汝啼吾手戰吾笑汝身長處處逢正月迢迢滯遠方飄  
零還栢酒衰病只藜牀訓喻青衿子名慚白首郎賦詩  
猶落筆獻壽更稱觴不見江東弟高歌淚數行

大歷三年春白帝城放船出瞿唐峽久居夔府將  
適江陵漂泊有詩凡四十韻

老向巴人裏今辭楚塞隅入舟翻不樂解纜獨長吁窄  
轉深啼欹虛隨亂浴鳧石苔凌几杖空翠撲肌膚疊壁  
排霜劍奔泉濺水珠杳冥藤上下濃淡樹榮枯神女峯  
娟妙昭君宅有無曲留明怨惜夢盡失歡娛擺闔盤渦  
沸欹斜激浪輸風雷纏地脉冰雪耀天衢鹿角真趨險  
狼頭如跋胡惡灘寧變色高卧負微軀書史全傾撓裝

囊半壓濡生涯臨臬兀死地脫斯須不有平川決焉知  
衆壑趨乾坤霾漲海雨露洗春蕪鷗鳥牽絲颺龍濯  
錦紆落霞沉綠綺殘月壞金樞泥笋苞初荻沙茸出小  
蒲雁兒爭水馬燕子逐檣烏絕島容煙霧環洲納曉晡  
前聞辨陶牧轉盼拂宜都縣郭南畿好津亭北望孤勞  
心依憇息朗詠劃昭蘇意遣樂還笑衰迷賢與愚飄蕭  
將素髮汨沒聽洪鑪丘壑曾忘返文章敢自誣此生遭  
聖代誰分哭窮途卧疾淹為客蒙恩早厠儒廷爭酬造

化樸直乞江湖灑灑險相迫滄浪深可逾浮名尋已已  
懶計却區區喜近天皇寺先披古畫圖應經帝子渚同  
泣舜蒼梧朝士兼戎服君王按湛盧旄頭初倣擾鶉首  
麗泥塗甲卒身雖貴書生道固殊出塵皆野鶴歷塊匪  
輟駒伊呂終難降韓彭不易呼五雲高太甲六月曠搏  
扶回首黎元病爭權將帥誅山林託疲茶未必免崎嶇  
行次古城店汎江作不揆鄙拙奉呈江陵幕府諸

公

老年當道路遲日復山川白屋花開裏孤城麥秀邊濟  
江元自閩下水不勞牽風蝶勤依槳春鷗懶避船王門  
高德業幕府盛才賢行色兼多病蒼茫汎愛前

江陵望幸

雄都元壯麗望幸歛威神地利西通蜀天文北照秦風  
煙含越鳥舟楫控吳人未枉周王駕終期漢武巡甲兵  
分聖旨居守付宗臣早發雲臺仗恩波起涸鱗

舟出江陵南浦奉寄鄭少尹



更欲投何處飄然去此都形骸元土木舟楫復江湖社  
稷纏妖氣干戈送老儒百年同棄物萬國盡窮途雨洗  
平沙靜天銜闊岸紆鳴蜩隨泛梗別燕起秋菰棲託難  
高卧飢寒迫向隅寂寥相煦沫浩蕩報恩珠溟漲鯨波  
動衡陽雁影徂南征問懸榻東逝想乘桴濫竊商歌聽  
時憂卞泣誅經過憶鄭驛斟酌旅情孤

陪鄭公秋晚北池臨眺

北池雲水闊華館闢秋風獨鶴元依渚衰荷且映空采

菱寒刺上踏藕野泥中素檝分曹往金盤小徑通萋萋  
露草碧片片晚旗紅盃酒霑津吏衣裳與釣翁異方初  
艷菊故里亦高桐搖落關山思淹留戰伐功嚴城殊未  
掩清宴已知終何補參卿事歡娛到薄躬

御定全唐詩錄卷三十一